



RADIO VICTORIA
Kujtim SHAHIQI
Drejtor
Gjilan

Ankesa Nr. 2017/218 KPM vs RADIO VICTORIA
Ref:1711/1280/KPM/am

VENDIM

Lidhur me Ankesën nr. 2017/218 – Komisioni i Pavarur i Mediave (KPM) kundër RADIO VICTORIA (“Pala Përgjegjëse”)

Faktet

1. Pala Përgjegjëse është pajisur me Licencë të KPM-së me datën 30 dhjetor 2009. Pranimi dhe nënshkrimi i Licencës obligon të Licencuarin që të veprojë në përputhje me Ligjin Nr.04/L-44 për Komisionin e Pavarur të Mediave dhe me të gjitha aktet nënligjore të miratuara nga KPM.
2. KPM me qëllim të vlerësimit të pajtueshmërisë së Palës Përgjegjëse me Ligjin e KPM-së dhe me Kushtet dhe Termet e Përgjithshme të Licencës ka realizuar një verifikim dhe në bazë të listës së publikuar nga ana e Komisionit Qendror të Zgjedhjeve ka konstatuar se Pala Përgjegjëse është në listën e kandidatëve për Asamble Komunale në Gjilan për Zgjedhjet Lokale 2017.
3. KPM me datën 28 shtator 2017 i ka dërguar Shkresë Palës Përgjegjëse, duke e njoftuar për shkeljen e Ligjit të KPM-së.
4. KPM pas dërgimit të Shkresës, me datën 3 tetor 2017, ka pranuar një përgjigje përmes e-mail nga Pala Përgjegjëse, me anë të së cilës pranon se është në listën zgjedhore si kandidat për Asamble Komunale për Zgjedhjet Lokale 2017, po ashtu thekson se është i gatshëm të iniciojë procedurën për ndryshim të pronësisë duke ia kaluar atë djalit të tij, gjë të cilën nuk e ka bërë, sepse KPM nuk ka pranuar asnjë dokument për ndryshim të pronësisë nga Pala Përgjegjëse.
5. KPM me datën 3 tetor 2017, Palës Përgjegjëse përmes e-mail i ka dërguar format e parapara për ndryshime në licencë, mirëpo Pala Përgjegjëse ka dështuar t'i sjellë format e plotësuar për ndryshimin e pronësisë në KPM. Me datën 16 tetor 2017 KPM ka tentuar ta kontaktojë Palën Përgjegjëse përmes telefonit mirëpo ka qenë e pamundur të kontaktohet.

6. Në bazë të Kushteve dhe Termeve të Përgjithshme të Licencës neni 15, paragrafi 2, heqja dorë nga pronësia mund të prodhoj efekt ligjor vetëm atëherë kur aprovohet paraprakisht nga KPM-ja. Bazuar në faktin se KPM deri më tani nuk ka aprovuar ndonjë kërkesë të Palës Përgjegjëse për heqjen dorë nga pronësia, konsiderohet se Pala Përgjegjëse ka vepruar në kundërshtim me nenin 22, paragrafi 3.1 të Ligjit të KPM-së.

Analiza Ligjore

7. Komisioni bazuar në të gjitha faktet dhe analizat e lartpërmendura konstaton se Pala Përgjegjëse ka bërë shkelje të nenit 22, paragrafi 3, pika 3.1 të Ligjit të KPM-së.

Neni 22, paragrafi 3, pika 3.1 i Ligjit të KPM-sw Nr. 04/L-44 përcakton se:

"Licenca e transmetimit nuk i lëshohet ose nuk do të vazhdoj t'i jepet:

partisë politike, bashkësisë fetare, grupit ose organizatës e cila menaxhohet nga individ i cili mban post të zgjedhur ose është anëtar i një organi ekzekutiv të një partie politike;"

8. Komisioni duke u bazuar në faktet e lartpërmendura konstaton se Pala Përgjegjëse ka dështuar të veprojë në pajtueshmëri me nenin 22, paragrafi 3, pika 3.1 të Ligjit të KPM-së Nr. 04/L-44, pasi që pronari i këtij subjekti transmetues është përfshirë në aktivitet politik.
9. Komisioni konstaton se Pala Përgjegjëse ka dështuar që të marrë hapa të nevojshëm për të vepruar në pajtueshmëri me nenin 22, paragrafi 3, pika 3.1 të Ligjit të KPM-së.

Vendimi

10. Komisioni bazuar në faktet dhe analizat e lartpërmendura konstaton se Pala Përgjegjëse ka bërë shkelje të nenit 22, paragrafi 3, pika 3.1 të Ligjit të KPM-së.
11. KPM kërkon nga Pala Përgjegjëse që në afat prej 10 ditësh nga pranimi i këtij Vendimi të njoftojë zyrtarisht KPM-në për përcaktimin e tij nëse do të vazhdojë të jetë pronar i subjektit të licencuar dhe të heqë dorë nga aktiviteti politik, apo vazhdon të jetë i angazhuar me aktivitete politike dhe të iniciojë procedurat për ndryshim të pronësisë së licencës. Përfshirja e Palës Përgjegjëse në aktivitete politike dhe në të njëjtën kohë të jetë pronar i OSHMA-së së licencuar nga KPM përbënë shkelje të Ligjit të KPM-së, që rezulton me ndërprerje të Licencës së KPM-së, ashtu siç është përcaktuar me nenin 30, paragrafi 1 pika 6, i Ligjit të KPM-së.
12. Komisioni bazuar në nenin 30, paragrafi 1, të Ligjit të KPM-së sanksionon me **Vërejtje** Palën Përgjegjëse për shkelje të nenit 22, paragrafi 3, pika 3.1, të Ligjit të KPM-së.

